


NOMBRAMENTU DIREKTOR TCB YEN TRABA

Bailando riba laman



Musikantnan di Hòfi Kultural a baila ku e pasaheronan di e barku krusero 'Villa Vie Odyssey'. Riba dèk nan a toka e músika di Boneiru na bahada di solo. E karkó a duna e señal, e barí e ritmo. E pasaheronan a baila huntu ku e bonerianonan. Solo a baha pokopoko tras di Klein Bonaire.



Ta deskont'e di nan sèn adishonal:

Gobièrnu ta paga debe di TCB

KRALENDIJK – Konsehal Daisy Coffie ta splika ku Gobièrnu ta bai paga e fakturanan habrí konserní tres aerolínea norteamerikano.

Despues ta deskontá e suma ku e supsidio

adishonal ku Ofisina di Turismo (TCB) ta risibí.

Ku esaki probamente ta kita e menasa ku Boneiru lo pèrdè buelonan di e aerolíneanan aki.

E situashon aki sigur a sòru pa basta inkietut

den turismo.

Asta BONHATA a atvertí tokante e konsekuensianan desastroso pa turismo. Sinembargo Coffie ta splika ku Gobièrnu mes no sa nada di e faktura i

awor ku kos a bai malu ta bati na porta di Gobièrnu.

Remarkabel ta ku segun Coffie Gobièrnu nunca a mira e akuerdo pa garantia.

E ta haña ku pa firma e akuerdo di garantia,

mester tabatin un representante di TCB i Entidat Públiko Boneiru (EPB) presente.

El a trese fuertemente dilanti ku lei ta prohibí Gobièrnu pa hasi fianza i para garantia.

Maneho finansiero ta sigui empeorá

KRALENDIJK – E maneho finansiero di Entidat Públiko Boneiru e aña ku a pasa a empeorá. Esaki a sali na kla for di e reportahe di mitar aña di Kolegio di Supervishon Finansiero, Cft. E kolegio ta mostra ku na mas okashon a pone nota marginal di e kalidat di e maneho finansiero na

Boneiru.

Dokumentunan di presupuesto hopi biá ta inkompleto i no aktual. Sinembargo, aña 2024 a keda fèrfelu pa Cft husga sí e presupuesto ta kumpli ku e normanan di e lei FinBES. Mayoria di e dokumentonan di presupuesto resien di 2024 ta laga mira un

empeoramentu di kalidat mas aleu, por lesa den e reportahe ku Cft a manda Tweede Kamer djamars.

Durante e segundo mitar aña di 2024, Boneiru tabatin problema ku e ehkushon di su maneho. E problemanan akí ta okashoná por medio di falta na forsa di ehkushon. Dor di esaki

no a ehkuté, òf a ehkuté lat proyektonan pa kua a pone medionan finansiero disponibel. E surplus ku e originá dor di esaki, na fin di e di tres kuartal a suma 31.3 mion dòler.

Cft tambe ta bolbe bin bèk riba e plan di Diputado di Finansa, Clark Abraham, pa Kolegio Ehekutivo mes

bai kobra impuestonan lokal. E kolegio ta konsehá Boneiru pa por lo pronto no ehkuté e tareanan ekstra akí debí na falta di personal. Ta eksistí e rísiko ku Entidat Públiko Boneiru dor di esaki ta bai kobra ménos impuesto ku awor dor di Belastingdienst Caribisch Nederland.

Bou direkshon di Fundashon BIATA

Boneiru ta debutá na Miss Teen Universal

KRALENDIJK -- Fundashon BIATA ta inisiá un página nobo den historia di Boneiru, komo ku ta prepará pa debutá ofisialmente na e evento internashonal Miss Teen Universal, un plataforma global ku ta buska i kontribuí na desaroyo di e futuro lidernan femenino den mundu di beyesa, kultura i publisidat.

Miss Teen Universal ta un evento internashonal ku ta uni paisnan di tur parti di mundu, ku meta prinsipal pa kreá oportunidatnan real pa mucha muhé entre 14 i 19 aña pa bria, ekspresá su talento i kualidatnan i kombertí den modelonan inspirador den su komunidad i mas ayá.

E sertámen no ta basá solamente riba aparensia, sino riba liderazgo,

edukashon, kulturalnan di diferente nashon, desaroyo personal i komunikashon.

Banda di esaki, Miss Teen Universal ta posishoná su mes komo un di e plataforma mas importante pa hóben ku ke krese den mundu di beyesa i publisidat, ku sosten di formashon profeshonal i introdukshon den un ret global.

Pa e promé biá den historia, Boneiru ta bai forma parti den e sertámen prestigioso akí ku Myangelica Gustowski di 17 aña, kende aktualmente ta karga e título Miss Teen Bonaire 2023/2024.

Myangelica ta e refleho di un hóben boneriano ku ta inspirá, determiná i prepará pa subi e esenario internashonal na Bogotá, Colombia, di 8 pa 15 di

yüli.

Durante e lunanan tras di lomba, ya Myangelica a kuminsá ku un trayekto intensivo di preparashon ku ta inkluí pasarela, public speaking, kreashon di un kampaña personal di inspirashon, desaroyo di imágen i estilo den kolaborashon ku Nory Casti Beauty Spa.

Tur e preparashon ta bou di guia profeshonal di Fundashon BIATA, ku ta dediká pa forma e lidernan pa isla. E meta ku partisipashon akí i ta pone Boneiru den un lus positivo riba e mapa internashonal, muestra kapasidat ku e ekipo tin pa eduká i forma hóbenan, inspirá otro hóbenan di Boneiru pa soña grandi i krea nan mes oportunidat, promové kultura i turismo riba

mapa mundial. Si komo komersiante òf individuo ke aportá i depositá sosten den e proyekto akí por kontaktá

Fundashon BIATA via: Email: biata.foundation@gmail.com, telefòn +599-787-6230





Nos ta den ‘Siman Santu’ – ‘Semana Santa’. E manera ku ta opservá e siman aki awendia ta kompletamente otro ku tempu ku m’a lanta den dékada sesenta. No lubidá ku mi a lanta pegá ku Misa di Coromoto i asina a eksperensia tur e tipo di aktividatnan aki hopi djaserka. I mi tabata sirbi misa.

‘Semana Santa’ ta kuminá ku ‘Domingo di Rama’. Mi ta kòrda ku Martins Winklaar, amigu i kompader di mi tata, Janchi, tabata enkargá ku buskamentu di rama (foyonan di pal’i koko) pa pastor bendishoná i parti durante santu sakrifisio di misa riba ‘Domingo di Rama’. Na un okashon mi a bai ku nan den pikòp di Tinchí pa buska rama na kunuku Warahama di Ramon Booi. Mi tata tabata bon amigu di Ramon. Nan a nabegá huntu na Merka. A base di nan amistad mi tata por a haña rama na kunuku di Ramon.

Pastor tabata bendishoná e ramanan aki ku awa bendita. Na fin di sakrifisio di misa tur hende por a pasa dilanti altá pa tuma un òf mas rama. Tin hende tabata bai ku basta rama kas. Tabatin e kerensia ku e ramanan aki tabata sagrado. Tabata flèktu un krus chikitu di nan i pone den kas òf den rancho di kunuku. Pa kore ku spiritu malu.

Tambe mi ta kòrda ku pastor tabata apartá un sèt di rama ku e tabata laga seka. Despues di tempu tabata kima nan pa traha e ‘shinishi’ ku tabata usa pa marka krus na frenta di fielnan riba ‘Djárason di Shinishi’. Segun mi tabata meskla e shinishi aki ku un sorto di zeta òf ta awa. Aki sí mi memoria ta laga mi na kaya.

Bièrnè Santu tabata e dia di mas sagrado ku tur dia di ‘Semana Santu’. Tempu aya tur negoshi tabata duru será. Emisoranan di radio i televishon tabata for di aire. Hopi hende tabatin miedu di e dia aki. Kasi semper, segun kerensia, un hende ta hoga riba Bièrnè Santu. I kere òf laga, enbèrdat esaki a yega di sosodé na vários okashon.

NOMBRAMENTU DIREKTOR TCB YEN TRABA

KRALENDIJK- E echo ku ainda no por nombra Elesiër Angel komo direktor di Tourism Corporation Bonaire (TCB) a sòru pa basta konsternashon i diskushon riba medionan sosial.

Aña pasá TCB a anunsiá ku Angel a bira e direktor statutario interino. Den mesun luna Bonaire Holding Maatschappij (BHM) a entregá petishon na Entidat Publiko Boneiru (EPB) pa asina haña aprobashon pa nombra

Angel komo direktor di TCB. Sinembargo EPB nunca a sigui ku e proseso pa finalmente nombra Angel.

Adely Jansen kende ta direktor di BHM ta konfirmá ku e proseso a tarda i apenas algun dia pasá el a risibí kontesta di parti EPB konserní algun pregunta adishonal.

Mester menshoná ku segun statutan di BHM, pa por nombra un direktor, EPB mester duna derechi di voto pa asina Jansen por

tuma e desishon konserní e nombramentu.

Kiko a pasa?

Segun informashon ku BONERIANO ta disponé di dje, despues ku BHM a entregá e petishon pa aprobashon di e nombramentu, esaki a keda pegá na Sekretariado Insular. Pues no a manda e petishon kaminda e mester a bai. Dado momentu diputado Clark Abraham públikamente a bisa ku e petishon ainda ta serka

BHM, lokual no ta e kaso. Despues di un investigashon interno a sali na kla ku ainda e petishon ta na Sekretariado Insular. Na e momentu ei, na mart 2025 a profundisá den e petishon i EPB tabatin algun pregunta akklaratorio. Sinembargo no a manda esaki pa BHM. Ta resientemente Jansen a risibí e preguntanan di parti EPB.

Den nos siguiente edishon BONERIANO ta amplia tokante e preguntanan aki.

Muchanan ta partisipá den ròlnan prinsipal di pelíkula

KRALENDIJK -- di kreativitat, kurashi i speransa pa mucha. Djasabra 12 di april a tuma lugá un evento yená Esaki tabata un casting

pa e pelíkula nobo ‘The Clubhouse’. Un total di 66 mucha entre 7 i 11 aña ku a registrá, por a pasa di mainta te anochi na Business Park pa partisipá pa un di e tres ròlnan prinsipal di e pelíkula.

E mayoria di e partisipantenan tabata mucha muhé i por a nota ku algun di nan tabata kompletamente den e ròl ku nan a bin e oudishon pe, esta kompletamente bistí komo e personahe.

Tur mucha a risibí e skrept di e oudishon adelantá via di nan mayornan pa asina nan por prepará nan mes pa bin demostrá nan talento di aktua.

Muchanan muhé por a ouditá pa e ròl di Alex, miéntas e muchanan hòmer por skohe pa hasi su oudishon pa sea Sam, òf Charlie.

Tabata unplaserpa wak kon e muchanan tabata hinka nan mes kompletu den e presentashon i mas importante, kon nan tabata

keda sostené ku amor dor di nan mayornan.

E ekipo di ‘The Clubhouse’ ta sumamente impreshoná ku e talento ku a demonstrá durante di hinter e dia. “Nos ke yama tur mucha ku a partisipá masha danki pa tuma e kurashi pa para dilanti un tim di profeshonalnan i tambe prensa,” Dennis Martinus, produktor di ‘The Clubhouse’, a bisa BONERIANO. “Nos ta gradisí tambe e mayornan pa nan apoyo kompleto.”

E tim lo tuma un momentu pa revisá tur oudishon i promé ku e luna kaba, e tim di ‘The Clubhouse’ lo informá e mayornan riba e siguiente pasonan ku lo sigui.

‘The Clubhouse’ ta un pelíkula di mucha netamente Boneriano ku ta primintí di bira hopi interesante pa sigui su proseso. BONERIANO sigur lo sigui kada stap di e produkshon akí pa asina por kubri e proyekto te na su final.



Pronóstiko di tempu pa Boneiru



Djaluna 14 te Djamars 15 April 2025
Parsialmente nublá ku posibilidat pa algun áwaseru

Ta parsialmente nublá ku posibilidat pa algun áwaseru. E temperatura máksimo lo ta aproksimadamente 31°C, e temperatura mínimo mas o ménos 26°C. Bientu for di direkshon ost ta moderá te basta fuerte, 4 te 5 Bft.

Altura di ola: 1.5-2.0 m (5-6 pia).

* Altura di ola válido pa laman grandi

POLÍTICA

Plan di reskate pa emisora NTR

KRALENDIJK/DEN HAAG -- Un mayoria den Tweede Kamer ta di akuerdo ku Minister Bruins ku mester baha e kantidat di emisora riba término largu dor di uni nan den asina yamá kasnan di transmishon. Pero ainda e minister tin ku traha riba su plannan, pasobra nan no ta sufisiente kla ainda, segun Twede Kamer. Esaki a bira bisto durante un debate tokante e plannan di ousteridat di Minister Bruins. Por ehèmpel, un mayoria di VVD, GroenLinks-PvdA, Volt, SP i NSC, ta haña e intenshon di Bruins pa permití NTR dispersé komo un emisora

independiente inaseptabel.

E partidonan a bin ku un plan di reskate den kua NTR i NOS, mester uni, pa NTR su programanan no bai pèrdi. Kasnan di transmishon, ta e palabra ku Bruins ta pone sentral den su plannan. E 11 emisoranan aktual mester muda pa kuater òf sinku kas di transmishon asina i mester logra sparmentu di mas ku 150 mion. E kantidat di shofùr mester keda redusí drástikamente. Miembronan di Parlamento e hasi hopi pregunta riba kon Bruins ta envishoná esaki i kon e kier logra esaki a korto plaso.

Parlamentario

di

GroenLinks-PvdA, Mohandis, ta haña ku no ta kla den kua direkshon e minister ke bai. “E ta un pùzel grandi.” Bruins a rekonosé ku mester hasi hopi ainda.

Tabatin bastante konfushon den e debate tokante e intenshon di Bruins pa permití NTR dispersé komo un emisora independiente. Bruins a bisa ku e ta komprondé ku un mayoria ke pa e programanan di NTR sigui. El a elogiá e personal i trahadónan di programa.

NTR tambe por, no mester keda será, Bruins a bisa i por tambe keda apsorbé den e otro kasnan di transmishon nobo. E tareanan i programanan ku NTR tin ta importante i mester keda salbuardiá debidamente den e sistema nobo di transmishon,” e minister a bisa.

SP, entre otro a haña esaki konfuso. “Kisas mi ta mucho bobo pa komprondé esaki,” e parlamentario di SP, Beckerman, a bisa, referiendo na e karta di Bruins di siman pasá.

Parlamentario di D66 Paternotte a bai di akuerdo. “NTR awor lo keda tras pasá

den su totalidat pa un otro emisora òf e programanan por distribuí entre otro emisora.” El a kritiká estado di kosnan. “Kon por ta ku NTR ta sinti su mes sorpresá dor di mester a lesa den un karta pa Parlamento ku e emisora aki ta desapareciendo.”

D66 ke pa e programanan di NTR sigui eksistí, pero

ainda tin preguntanan tokante di fushon ku por ehèmpel NOS. “Pa loke ta trata D66, un unidat atministrativo lo ta posibel, pero mester por mantené un bon separashon entre hasi notisia manera NOS ta hasi i programanan manera Sinterklaasjournaal, òf Het Klokhuis,” Paternotte a bisa.



Kiko ta pasando ku Bonaire.nu?

Pa: Willem Cecilia

KRALENDIJK -- Bonaire.nu a skohe atrobe pa publiká sin reflekshon un artíkulo di opinion di un misterioso Keers Hendrik, ku hopi ta hasi pensa riba un vershon lokal di Wim van Huizen, ku desinformashon komo marka di fábrica.

Ku un medio manera Bonaire.nu ta duna espasio pa atakenan anónimo sin transparensia ku no ta kuadra, ta realmente lamentabel, ku tur rèspèt pa libertat di opinion i libertat di prensa. Desinformashon ta e plamamentu deliberadamente di informashon falsu, òf

engañoso, hopi biá ku un meta spesífiko manipulashon, konfushon, òf influensia opinion públiko.

Oposishon na Boneiru sigur despues di hopi tempu, demasiado mes, porfin a wak su momentu i ku bon motibu.

Kolegio di Supervishon Finansiero, Cft, a konfirmá resientemente ku e maneho finansiero di Kolegio Ehekutivo ta bai di malu pa direkshon di un desaster. Den e di tres kuartal, a keda nada ménos ku 31.3 mion sin usa. Sèn ku no a lora den komunidat, un prueba palpabel ku oposishon ta

den su derecho pa reklamá. I no bin bisa ku ta falta di e gobièrnunan anterior, pasobra na 2022 i 2023 e gobièrnu di e tempu ei a haña deklarashon di aprobashon di e akountent eksterno pa loke ta trata e kuantanan anual pa promé biá den historia. Pa e gobièrnu akí haña un deklarashon di aprobashon di su kuantanan anual di 2024, lo ta algu hopi serka di un milager.

Talbes ta ora ku Bonaire.nu pone mas energia den skrutiná pamfletanan polítiko ora ta publiká artíkulonon yen di desinformashon di hendenan deskonosí.

Coral Casino Bonaire

is expanding the team and we need your support! Do you recognize yourself in the profile below?

Slot attendant
Fulltime

What will you do?

As a Slot Attendant you monitor slot machine functionality and player activity. You will:

- Ensure all machine tilts or errors are attended to in the quickest time possible
- Escalate or report major machine errors to the technical department and assist them with the overall maintenance and machine moves
- Ensure minimal downtime on slot machines
- Pay out of jackpots, taking into account verification & internal processes
- Interact with guests, making sure that guest satisfaction and service levels are always maintained
- Ensure slot machines & the gaming floor are neat and presentable.
- Assist with minor guest disputes and involve management or the technical department in case of any major concerns.

What we ask of you:

We are looking for the following requirements in our new slot attendant:

- Proficient in basic computer skills
- Able to perform basic repairs and troubleshooting on slot machines.
- Basic understanding & comprehension of the English and Spanish language
- Availability during day and nightshifts from Monday to Sunday and during public holidays.

It is important that candidates are aware that in this role it is required to lift and move gaming equipment and that they will also work in the casino during opening hours.

For this position, you must either possess or be eligible for a residence and work permit for Bonaire within a short time frame.

What we offer:

- A competitive salary
- Above-statutory vacation days starting in your first year of employment
- Additional benefits, such as supplementary health insurance, discounts on gym memberships, and opportunities for various training programs.

Interested?

Do you have questions? Feel free to reach out via hr@boncrownholding.com If you are interested, we look forward to receiving your CV and motivation at hr@boncrownholding.com

Hulanda Karibense ta fuertemente komprometí kontra trafikashon i kontrabanda di hende

KRALENDIJK --Den 2025, Hulanda Karibense ta intensifiká su esfuerso pa kombati trafikashon di hende i kontrabanda di hende. Trafikashon di hende ta un violashon serio di derecho humano, kaminda ta eksplotá individuonan fòrsá. E ta un krímen kompliká, kaminda víktima ta fòrsá pa hasi kos kontra di su boluntat, regularmente bou di menasa, engaño òf violencia. Víktimanan hopi biaha no ta realisá ku nan ta den un situashon di eksplotashon i ta biba den miedu i inseguridat. Trafikashon di hende tin diferente forma, manera: eksplotashon seksual, eksplotashon laboral, eksplotashon kriminal, òf kitamentu fòrsá di órganu. E krímen aki tin

konsekuensia grandi pa salú físiko i mental di e víktima i mester di envolvimentu aktivo di henter komunidat pa kombati esaki na un manera efisiente. Durante henter aña lo tin aktividat- i kampañanan di konsientisashon na Boneiru, Sint Eustatius i Saba, ku ta duna informashon konkreto kon pa aktua tantu pa siudadano komo pa profeshonalnan. E programa di aña a kuminsá den promé kuartal ku eventonan di ret na Saba i Sint Eustatius, pa stimulá kolaborashon entre partnernan di kadena di e islanan. Dia 14 di aprel lo tin un evento di ret na Boneiru, ku tambe ta inklui treinen spesialisá riba señalá e krímen aki i kiko por hasi. E treinen ta pa

profeshonalnan den kadena hudisial i kuido. Na yùni lo tin atenshon spesial pa Dia Internashonal Kontra Trabou di Mucha (12 di yùni), ku ta enfoká riba eksplotashon kriminal di menor di edat. Ta importante pa rekonosé eksplotashon kriminal bou di hóben trempañ i aktivamente kombati esaki. Por pone hóbenan bou di preshon pa transportá droga, hòrta kos òf pa laba plaka. Hopi biaha e ta parse un forma di gana sèn rápido, pero e víktima ta keda atrapá den un ret di eksplotashon i dependensia. Pa e motibu aki, e empeño ta pa traha aktivamente huntu ku skol- i institutonan edukativo pa hasi hóbenan resiliente i krea konsientisashon. Durante henter aña

lo tin kampañanan riba televishon, radio i media sosial, unda ta envolví públiko aktivamente ku e pregunta: “Kiko bo por hasi?” Tambe lo distribuí tarhetanan ku señalnan, pa hende sa kon i unda por mèldu situashonnan sospechoso di forma anónimo. Entrante ougùstùs lo bo mira e kampaña “Bo ta rekonosé e señalnan?” ku diferente medionan di komunikashon manera ‘billboard’ digital, poster, i pamfleta. Klousura di e aña ta

alrededor di 18 di òktober, Dia Nashonal kontra Trafikashon di Hende, ku aktividatnan grandi i un ‘media tour’ informativo. Hulanda Karibense ta bisa bon klá “Nò” kontra trafikashon i kontrabanda di hende. Pero esaki no ta sufisiente. Bo tambe por yuda pa para e krímen aki. Rekonosé esaki i mèldu esaki. E mensahe prinsipal di e kampaña ta: “Huntu kontra trafikashon di hende: nos islanan, nos responsabilidad”. Mèldu esaki!



Yuda nos tene nos playanan limpi

extra
...number 1

www.extraboneiru.com

Adolf's Construction B.V.

ta buska
- elektrishen

Pa mas inf. por yama
+599 770-3774

REUNION KOMISHON FIHO (WW)

Djaweps 17 di aprel 2025 pa 14:00 or ta tuma lugá un reunion di komishon fiho di Asuntunan di trabou (Werkwijze , WW) den sala di reunion den Passangrahan.

AGENDA

1. Apertura i partisipashon
2. Momento pa suidadano hiba palabra
3. Dokumentonan ku a drenta
4. Stipulashon di agènda
5. Stipulashon di relato kórtiku di 28 di mart 2025
6. Tratamentu di konsepto di relato finansiero di Konseho Insular 2026
7. Situashon aktual di revishon di diferente ordenansa i desishon nan di Konseho Insular:
 - a. Ordenansa "vaste raadscommissie werkwijze Bonaire 2023"
 - b. Ordenansa di adaptashon di algun disposishon di e ordenansa "Reglement van orde Eilandsraad Bonaire 2011.
 - c. Ordenansa insular "werkbezoeken en dienstreizen Bonaire 2023"
 - d. Desishon di Konseho Insular "instructie en mandatering Eilandgriffier Bonaire 2023.
8. Klousura

Ta publiká e konvokashon akí riba e parti públiko di e sistema di informashon di Konseho Insular (www.konsehoinsular.com). Te asina leu ku ta aplikabel, e dokumentonan konserní manera kustumber ta na Grefi na disposishon. Ta transmití e reunion akí live riba TV (NosTV i EnergiaTV), e página di i Youtube, via radio (93.1fm) i e website di Konseho Insular.

D. Cobble
PRESIDENTE

EILANDSRAAD BONAIRE

Mas aerolínea ta ofresé konekshon

Mas buelo na zomer

KRALENDIJK -- Bonaire International Airport N.V. (BIA) i Tourism Corporation Bonaire (TCB), ta anunsiá e skema di buelo pa e temporada di zomer benidero. E zomer akí, mas kompania di aviashon ta ofresé konekshonnan pa for di Aeropuerto Flamingo, dunando tantu residentenan komo bishitantenan un eskoho mas amplio durante e temporada tradishonalmente mas trankil. Kompará ku temporada di zomer último, un kantidat di kompanianan di aviashon nobo ta aktivo na Boneiru. Por ehèmpel JetBlue ta bula dos biá pa siman for di New York JFK pa

Aeropuerto Flamingo i Corendon tambe ta bula dos biá pa siman for di Amsterdam. Air Century lo kuminsá ku un buelo di temporada djáragon pa Santo Domingo - La Isabela. Den koperashon ku BIA i TCB, American Airlines a anunsiá un oumento signifkante den kapasidat di asiento pa Miami e zomer akí. Te ku sèptèmber, lo operá buelonan kuater biá pa siman ku e avion B737-800 konsiderablemente mas grandi.

Via Miami, henter e merkado Norte Amerikano ta mihó sirbí. Buelonan interinsular ku ta di gran importansia pa komunidad, tambe ta sigui desaroyá konstantemente. Danki na avionnan mas grandi di Z Air ta premirá ku e kapasidat di asiento pa i for di Kòrsou lo oumentá.

Ademas Divi Divi Air

ta ampliando su skema di buelo di zomer 2025 a bira mas diverso. Ku lo sigui ku su buelonan buelonan diario i semanal, mainta i anochi tres biá pa biaheronan por konta riba konekshonnan frekvente pa destinashonnan mas importante na Europa, aerolíneanan internashonal Nort Amérika i e region i regional, e orario di Karibense.

BIA		BONAIRE						
FLIGHT SCHEDULE		Summer 2025 starting May 1st						
DESTINATION	AIRLINE	MON	TUE	WED	THU	FRI	SAT	SUN
NEW YORK JFK	jetBlue		✓				✓	
MIAMI	American Airlines	✓		✓		✓	✓	
ATLANTA	DELTA						✓	
NEW YORK NEWARK	UNITED						✓	
HOUSTON	UNITED							✓
AMSTERDAM	KLM	✓	✓	✓	✓	✓	✓	✓
AMSTERDAM	TUI	✓		✓	✓	✓	✓	
AMSTERDAM	corendon			✓				✓
SANTO DOMINGO JBO	AIRCENTURY			✓				
SANTO DOMINGO SDQ	SKYhigh		✓					
CURACAO I SINT MAARTEN	WINAIR	✓		✓		✓		
CURACAO I ARUBA	DIVIDIVI	✓	✓	✓	✓	✓	✓	✓
CURACAO I ARUBA	ZAir	✓	✓	✓	✓	✓	✓	✓

Entrante promé di yùli

Peter Hengeveld direktor di JICN

KRALENDIJK -- Peter Hengeveldakuminsápromé di april 2025 na Dienst Justitiële Inrichtingen (DJI) na Hulanda komo preparashon pa su funshon nobo komo direktor di Instituto Hudisial Karibe Hulandes, JICN.

Despues di un periodo di introdukshon di un luna na Hulanda, e ta sigui ku su preparashon na Boneiru na luna di mei.

Entrante promé di yùli, e ta tuma e funshon di direktor di JICN di forma ofisial na su enkargo i ta sigui asina e direktor aktual, Wibo de Vries.

Na febrüari, Hengeveld a bishitá Boneiru pa sera konosí, kaminda ku el a sera konosí ku e instituto

i a hasi preparashonnan práktiko pa su mudansa benidero.

Hengeveld: "Mi ta ansioso pa inisiá komo direktor di JICN ku e tareanan importante i desafiante ku ta warda riba nos. Huntu ku mi koleganan, mi ke traha riba un sosiedat seif na e tres islanan. Pa esei un bon kolaborashon ku nos partnernan ta esensial."

Hengeveld tin 32 aña di eksperensia den Kuerpo di Marinir, kaminda ku el a ehersé diferente tarea den e sektor di prizòn den e parti Karibense di Reino.

Despues, el a traha komo direktor operashonal na un kompania di marmer i komo direktor i dirigente

di un instituto di enseñansa privá pa estudio di MBO i HBO.

Hengeveld su nombramentu komo direktor di JICN ta resultado di un prosedura di reklutashon habrí, kaminda a hasi e vakatura konosí ampliamente pa duna tur hende oportunidad pa solisitá.



Coral Casino Bonaire

is expanding the team and we need your support!
Do you recognize yourself in the profile below?

Gaming technician Fulltime

What will you do?

As a Gaming Technician you are responsible for the overall day-to-day maintenance of our slots and table equipment:

- Follow and conduct preventative maintenance on all the gaming equipment
- Troubleshooting of gaming equipment & conducting the necessary repairs
- Maintaining accurate records of repairs & maintenance schedules
- Maintaining an inventory of all gaming equipment & ensuring this is continually updated
- Conducting machine changes and machine moves
- Attend to slot machine tilts to minimize downtime of machines
- Always maintain a neat, safe gaming & work area
- Assist guests with machine tilts & other queries to ensure guest satisfaction
- Assist the slots team with jackpot payouts & verifications.

What we ask of you:

We are looking for the following requirements in our new gaming technician:

- Proficient in basic computer skills
- A minimum of 2 years in a similar position
- Basic understanding & comprehension of the English and Spanish language
- Availability during day and nightshifts from Monday to Sunday and during public holidays.

It is important that candidates are aware that in this role it is required to lift and move gaming equipment and that they will also work in the casino during opening hours.

For this position, you must either possess or be eligible for a residence and work permit for Bonaire within a short time frame.

What we offer:

- A competitive salary
- Above-statutory vacation days starting in your first year of employment
- Additional benefits, such as supplementary health insurance, discounts on gym memberships, and opportunities for various training programs.

Interested?

Do you have questions? Feel free to reach out via hr@boncrownholding.com If you are interested, we look forward to receiving your CV and motivation at hr@boncrownholding.com

Moveshon na restorant Trocadero

KRALENDIJK – E ku a ser'é no ta konosí, restorant situá pariba di Plasa, Trocadero, tabata será último lunanan. E rason ku a ser'é no ta konosí, pero awor por ripará ku tin moveshon na e edifisio aki. Un señal pues ku e lo bai habri atrobe, sinembargo no ta konosí ku esaki lo sosodé bou di mesun nòmber. Promé ku a operá e

sitio aki komo Trocadero e último añanan, e tabata hopi konosí i famá komo City Café. Pero despues el a kambia di operador i nòmber. Esta di City Café pa Trocadero.

Awor si bai mas leu den historia por kòrda ku e sitio aki tabata konosí komo Restorant Lisboa,

operá pa famia Apolinario. Angelino Apolinario i su famia, di orígen portugues, a establese na Boneiru den añanan setenta. Nan tabatin diferente negoshi, entre kua Hotel Rochaline i Restorant Lisboa. Awor ta di spera kon lo bai operá e sitio aki den futuro. Kisas Trocadero mes?



REUNION KOMISHON FIHO (I&K)

Djaweps 17 di aprel 2025 pa 10:00 or ta tuma lugá un reunion di komishon fiho di Asuntunan Interinsular i relashonnan den reino (Intereilandelijk & Koninkrijksrelaties, I&K) den sala di reunion den Passangrahan.

AGENDA

1. Apertura i partisipashon
2. Oportunidat pa siudadano hiba palabra
3. Dokumentonan ku a dreña
4. Stipulashon di agènda
5. Stipulashon relato kórtiku i lista di desishon di 16 di yanüari 2025
6. Bilateral ku Statia
7. Kontinuashon di bishita di trabou na Hulanda di mart último
8. Klousura

Ta invitá Kolegio Ehekutivo.

Ta publiká e konvokashon akí riba e parti públiko di e sistema di informashon di Konseho Insular (www.konsehoinsular.com). Te asina leu ku ta aplikabel, e dokumentonan konserní manera kustumber ta na Grefi na disposishon. Ta transmití e reunion akí live riba TV (NOSTV i EnergiaTV), na radio (93.1fm), página di Youtube i e website di Konseho Insular.

D. Cobble
PRESIDENTE



BACK IN STOCK

OPTENIBEL NA

- OFISINA DI EXTRA
- VAN DEN TWEEL SUPERMARKET
- DELMAR



Fluid Art B.V.

ta buska

- 1 Epoxy Installateur

Pa mas inf. por yama

+599 780-5972

Stone Crusher N.V.

ta buska

- 1 mekániko diesel

Pa mas inf. por yama

+599 717-8728

Transporte di desperdisio biomédiko a kuminsá

K R A L E N D I J K di Landfill, a kuminsá. -- Djaluna 31 di mart Ta ehekutá e trabounan e trabounan di re-akí bou di guia di e-empaketamentu di empresanan spesialisá desperdisio biomédiko RMD-Advies i Renewi. ku a almasená riba tereno Promé ku a kuminsá ku



e trabou, e empleadonan a haña treinen pa por prosésá e desperdisio na un manera seif i responsabel. A saka e desperdisio for di kònteinernan bieu i a empaketá nan di nobo den material adekuá pa transporte i prosesamentu. Seguidamente a pone esaki den kòntainer nobo pa transporte.

Durante di e re-empaketamentu, bou di direkshon di GGD Boneiru, a tuma diferente muestra di superfisie.

For di e muestranan akí a resultá ku no tin bakteria ku ta kousa malesa presente den e desperdisio.

Djaluna 14 di april a transportá e promé sinku kònteinernan ku barku pa Hulanda. Einan ta prosésá nan den un instalashon di fòrnunan aprobá ku ta adekuá pa kima desperdisio biomédiko.

Den e periodo binidero, na e mesun manera ta re-empaketá i transportá e stòk ku a sobra.

Kolegio Ehekutivo ta kontentu ku a pone e paso importante akí pa loko ta trata prosesamentu responsabel di desperdisio biomédiko. Gobièrnu di Boneiru ta vigilá e proseso minusiosamente i ta enfatisá importansia di un transporte seif i bon pa medio ambiente.



Mensaje de MarianReina de la Paz desde Medjugorje 25 de MARZO de 2025

"Queridos hijos! En este tiempo de gracia en el que están llamados a la conversión, los animo, hijitos, a ofrecermes sus oraciones, sufrimientos y lágrimas por la conversión de los corazones que están lejos del Corazón de mi Hijo Jesús. Oren conmigo, hijitos, porque sin Dios no tienen futuro ni vida eterna. Los amo, pero sin ustedes no los puedo ayudar. Por eso, díganle sí a Dios. ¡Gracias por haber respondido a mi llamado!“.03/25

MENSAHE DI KRUS

Pasobra e mensahe di e krus ta lokura pa esnan ku ta peresé, ma pa nos ku ta wòrdu salbá e ta e poder di Dios. 1 Korintionan 1:18(BS)

Bo a yega di tende e Evangelio? Bo sa kiko ta Evangelio? Evangelio ta Bon Nobo di e mensahe di krus; ken Hesus ta, kiko El a hasi pa hende i dikun El a hasi esaki. Tur hende mester kere i aseptá e mensahe akí si nan ke tin salbashon, esta pordon di piká i bida eterno.

Evangelio tin tres parti:

1. Dios a krea hende perfekto, ma hende a hasi piká i piká meresé kastigu eterno - Romanonan 3:23
2. Dios a stima hende asina tantu ku El a manda Su Yu na mundu pa muri na nos lugá, pa nos por haña pordon i salbashon eterno – Juan 3:16; Romanonan 5:8
3. Dios a lanta Hesus riba di tres dia i a kumpli ku Su Palabra – 1 Korintionan 15:3-4

E Mensahe ta kla, simpel i grátis; Hesus a kumpli ku tur rekisito na nos favor. Awor ta na abo i ami pa kere i aseptá e Evangelio pa asina nos haña salbashon i biba pa semper. Bo a aseptá e Evangelio kaba? Awe ta e dia!

I abo ku ya a tende i aseptá e Evangelio i sa kiko e ta; kiko bo ta hasi ku e Mensahe? Kòrda ku Evangelio ta poder di Dios pa salbashon pa tur ku ta kere (Pasobra mi no tin bèrguensa di e evangelio, pasobra esaki ta e poder di Dios pa salbashon pa tur ku ta kere, pa e hudu promé i tambe pa e griego. Romanonan 1:16). Bo ta kumpli ku bo tarea di kompartí e Evangelio? Òf bo tin bèrguensa pa kompartí?

Gilda Beukenboom-Sintjago
Produkshon PGM

Programanan di Bonaire.tv

TELBO kanal 70

Flamingo TV kanal 23

Djårason 16 april 2025

12.00 Herensia: Marzel de Palm (2006)
13.00 Herensia: Marzel i Haime de Palm
14.00 Herensia: Marzel de Palm 1
15.00 Herensia: Marzel de Palm 2

16.00 Herensia: Felix Antonio Cecilia 3
17.00 Aki Boneiru: Sigfrido Marchena i Wilson Frans
18.00 Herensia Siglo 20: Elsio Boekhoudt
19.00 BAPA: Ernesto Melaan

20.00 Herensia: Felipa Sint Jago-Wijman
21.00 Aki Boneiru: Segni Bernardina
22.00 Herensia Siglo 20: Petra Beaumont
23.00 BAPA: Erich Arias

Tur mèrdia 12'or ta kuminsá un programashon nobo di 4 ora. E programashon aki ta ripiti pa 24:00.

Tokante e trayekto di intensivashon di maneho

Bista bèk riba enkuentronan di partisipashon ‘Papia ku Pueblo’

KRALENDIJK

-- Ku satisfakshon Entidat Públiko Boneiru ta wak bèk riba tres eksitoso enkuentro di partisipashon ‘Papia ku Pueblo’ ku resientemente a tuma lugá dianan 22 di mart, 7 di aprel i 8 di aprel. E enkuentronan akí tabata den signo di e trayekto di intensivashon di maneho, un trayekto kaminda Gobièrnu Hulandes a otorgá 5,5 mion euro pa Boneiru pa e periodo 2025–2029. E meta ta pa sostené proyektonan di maneho ku ta kontribuí na oumento di konsientisashon tokante pasado di sklabitut i fortifikashon di Boneiru su identidat kultural. Durante e enkuentronan, a papia ku komunidad lokal tokante diferente proyekto ku ta fortifiká konsientisashon tokante pasado di sklabitut i kultura di Boneiru, manera lantamentu di un sentro di patrimonio, desaroyo di un método nobo di enseñansa ‘Hulandes komo idioma estranhero’ i digitalisashon i aksesibilidat di archivo. E kòmbersashonnan tabata



habrí i konstruktivo, kaminda e partisipantenan a kompartí nan opinionnan, ideanan i preokupashonnan tokante kon e proyektonan akí por kontribuí mas mihó na un mihó futuro pa Boneiru.

Apresio pa embolbimentu aktivo

En total mas òf ménos 80 partisipante a ekspresá nan mes tokante eheshon di e proyektonan. Nan a papia entre otro tokante importansia di un sentro di patrimonio, konservashon di storianan i konosementu

di ántes i nòmber di antepasadonan ku a biba den pasado di sklabitut i tokante kon por protehá patrimonio di e isla tantu lokalmente komo regionalmente. E partisipantenan a duna aporte balioso tokante kon e proyektonan akí por kontribuí na nan bida diario, na futuro di hóbennan i na fortifikashon di komunidad.

Proyektonan pa fortifikashon di maneho

E trayekto di intensivashon di maneho ta enserá vários iniciativa, entre otro:

1. Sentro di patrimonio i Museo: Un sitio sentral pa kolekshoná i kompartí kultura i historia di Boneiru.

2. Método di enseñansa Hulandes komo idioma estranhero: Un método di lès ku ta konektá mihó ku e ambiente sosial ku muchanan Boneriano ta lanta aden.

3. Fortifikashon di kadena kultural: Fortifikashon di por ehèmpel Plataforma NGO, di manera ku organisashonnan kultural por haña i fortifiká otro i traha huntu ku otro.

4. Liña di tempu di Boneiru: Kolekshonamentu di susesonan, personanan i tradishonnan importante for di den historia di Boneiru, di manera ku por desaroyá un kanòn lokal ku e museonan i enseñansa por usa.

5. Digitalisashon di archivo: Digitalisashon di dokumentunan i potretan historiko, etc., pa hasi nan aksesibel pa tur hende. Esaki ta tuma forma di un kolaborashon konhuntito entre archivo di Entidat Públiko Boneiru i FuHiKuBo.

6. Monumentu di nòmber i investigashon

di nòmber: Lanta un monumentu pa rekordá hendenan ku bou di sklabitut nan a pone traha obligatoriamente na Boneiru i determinashon di nan nòmbernan di famia.

7. Aporte Archivo Nashonal Kòrsou: Digitalisashon di dokumentunan historiko di Boneiru ku aktualmente ta na Kòrsou.

8. Interkambio di patrimonio: Kompartí patrimonio i ekspertisio kultural entre e islanan den área Karibense.

E siguiente pasonan

Aporte di komunidad ta keda esensial pa ékxito di e inisiativanan akí. Entidat Públiko Boneiru ta enkurashá tur hende pa keda aktivamente enbolbí i pa kompartí nan ideanan.

Basá riba fitbèk di komunidad i toma di desishon interno, Kolegio Ehekutivo i Konseho Insular, Entidat Públiko Boneiru lo stipulá prioridat i disidí kua ta e proyektonan ku finalmente nan lo inklui den e agènda di akshon.

Naturalmente lo informá siudadanonan mas aleu tokante esaki.



10|

Djárason 16 aprel 2025



Bailando riba laman

Musikantnan di Hòfi Kultural a baila ku e pasaheronan di e barku krusero ‘Villa Vie Odyssey’. Riba dèk nan a toka e músika di Boneiru na bahada di solo. E karkó a duna e señal, e barí e ritmo. E pasaheronan a baila huntu ku e bonerianonan. Solo a baha pokopoko tras di Klein Bonaire.







People · Professionalism · Partnership

**CARGO OPERATIONS
AGENT BONAIRE**

FULL-TIME | BONAIRE



LOOKING FOR
A NEW
CHALLENGE?

If you are looking for a challenge in a rapid environment in the aviation services industry and are motivated to work in a multicultural company and a position that allows you to put your ideas into practice, this will be an excellent opportunity for you.

Apply by emailing:

Erlisianny Adelina
erlisianny.adelina@swissport.com


MAIN RESPONSIBILITIES

- Takes care of the flight registration and deregistration both internally and with the customs authorities by established rules.
- Completes incoming and outgoing flights based on check manifests from the freight controller, discusses any deviating situations with the freight controller/shift manager and the customer.
- Prepare any damage reports for the benefit of airlines and the claims department.
- Ensures that special cargo is given specific treatment such as refrigerated/freeze cargo, value shipments/livestock, and hazardous substances.
- Uses the reservation system in such a way that shipments are assessed on weight and volume to optimally utilize the freight capacity offered.
- Follows the operational/administrative processing concerning the cargo flow and takes corrective action, if necessary, concerning the administrative/operational recording thereof.
- Is charged for the preparation of transport documents for shipments presented by the client for transport. Takes care of the calculations and further handling of the shipment. Advises the arrival of urgent shipments outside office hours and takes care of the further handling of these shipments.
- Prepares and manifests outgoing or transit shipments based on waybills and maintains contact with flight operations about the planning of outgoing flights.
- Carry out all activities related to the position.

YOUR PROFIL

- Mavo or Havo diploma or equivalent
- Excellent social and commercial qualities
- Is familiar with the work in the Routing department.
- Commercial and service-oriented attitude
- Must be able to express sight clearly in word and writing in English, Dutch, and Papiamentu
- High degree of accuracy
- Accurate
- Representative

swissport.com

 swissport



ENTIDAT PÚBLIKO
BONEIRU



Vakatura

Tá e diferensia ku bo ke mira.
Solisitá awó!

Empleado di Maneho di
Informashon i Aplikashon

Mas informashon?



Último dia pa solisitá: 29 di aprel 2025
www.bonairegov.com/pa/bestuur-organisatie/vakatura

PÁGINA SOCIAL

Pedro 'Shon Bubu' Martis a yega 100 aña

KRALENDIJK -- bida. Mirando ku e persona Fundashon Nos Grandinan a bini ku un inovashon. Bispu di 100 aña tambe ta un selebrashon, ta e lastu dia pa selebrá 99 aña di en kuestion i su famianan ya ta den un euforia wardando 12'or di anochi bati pa e 2 sifranan bira 3 sifra, Fundashon Nos Grandinan tambe ke aportá na e ambiente sperando 100 aña ku presensia di medionan di komunikashon i tambe animashon musikal. E inovashon akí a kai den bon



tera i lo kontinuá ku bishita 'Bispu di 100'.

Djaluna 14 di april, Kòrsou tin un sentenario nobo di e bario di Mahuma. Ta trata akí di Pedro Martis, mihó konosí komo Shon Bubu, oriundo di Boneiru. E sentenario akí ta na kabes di 4 generashon, konsistiendo di 10 yu, 22 ñetu i 15 bisañetu. Famia kompletu ta felis, pero tambe tristu, debí ku apénas 2 aña pasá, esposa di Shon Bubu ku ta mama, wela i bisawela di famia, a fayesé.

Shon Bubu ta bon di salú i un sabio ku hopi historia. E kabayero akí ta biba na su kas, rondoná pa su desendientenan i ta gosa di hopi amor. Huntu nan ta forma un famia musikal

i asta serenada familiar e famia akí tin.

Shon Bubu te awe ta toka su piano, keyboard, kitara, harmónika i sinfonia di boka tambe. Antes, Shon Bubu tabata traha pa Shell komo kapitan di toubot. Ora a puntra Shon Bubu ta kua ta su kuminda preferí, a resultá ku e tin hopi kuminda ku e stima i tur ta kuminda kriojo, manera entre otro batata dushi, pampuna, yambo, kònkòmber chikí, banana i tutu. Fundashon Nos Grandinan ta uni huntu ku famianan i tambe amistatnan pa pidi bon Dios pa sigui bendishoná Shon Bubu i bendishon'é ku mas grasia abundante pa sigui mira mas aña di bida huntu ku su famia ku ta ador'é.

Selebrashon na Sentro Médico Sùit

KRALENDIJK -- Trahadónan na Sentro Médico Sùit e siman akí a selebrá durante dia huntu. Tur siman nan ta selebrá kualke okashon. Nan trabou ta intenso kontinuamente i tin momentu ta importante pa para ketu i reflekshoná pa sigui. E siman akí

komementu di bolo tabata nan refleho, nèt durante break, ku ta parti nan dia di trabou na dos. Tambe nan ta preparando pa selebrá Dia di Rincon, sigur mirando ku tin un desendiente di Rincon ta laborá einan. Potrèt momentu nan tabata disfrutá di un bon pida bolo.



WE'RE HIRING!!!

If you are looking for a challenge in a rapid environment in the aviation services industry and are motivated to work in a multicultural company and a position that allows you to exhibit efficient and professional service, this will be an excellent opportunity for you.

Cargo Agent

Requirements:

Valid Driver's License
Must be able to lift heavy objects up to 70 pounds
Flexible to work on various shifts (early morning, overnight, weekends and public holidays)

All interested applicants are required to apply via
Email: erlisianny.adelina@swissport.com

É Fun

Awo Digital

Get the Fun Miles App Now!

Join us on **April 30, 2025**, as we celebrate together! Stop by our stand, show off your Fun Miles app, and receive a **FUN surprise!**

funmiles.net



Simadan di Pastó dos dia di Pasku

KRALENDIJK – Djaluna 21 di aprel, dos dia di Pasku di Resurekshon, Parokia San Luis Beltran ta selebrá e kustumber Simadan di Pastó. E dia ta kuminsá ku un Santa Eukaristia pa 9’or di mainta. Despues di misa ta kuminsá bende kuminda i diferente kos di kome i bebe.

E simadan ta sali 5’or di atardi for di Plenchi Nolly Celestijn, pariba di misa, bai sùit i ta pasa den kayanan di Rincon. Despues di yegada di simadan na misa, e selebrashon ta sigui ku presentashon di diferente grupo musikal. Ta bai tin diferente stènt i aktividat.

Pader Baak ta invitá pueblo di Boneiru pa bin selebrá huntu ku Parokia di Rincon Simadan di Pastó, kuminsando for di mainta ku Santa Eukaristia gradisiendo Dios pa tur kosecha risibí riba tur

áreanan di bida, kosecha di kunuku, trabou, familiar i spiritual i den oranan di atardi kue anochi por bin wapa simadan riba ritmo di agrupashonnan musikal.

Pader Baak ta kombidá tur grupo di folklor pa bin engrandesé e simadan den kayanan di Rincon. Gruponan di folklor ku kier partisipá por tuma kontakto ku Dorothy Cicilia na telefòn 796-9046. Simadan di Pastó tin komo meta pa rekoudá fondo pa mantenshon di e edifisio di parokia di Rincon i tur ku kier koperá por hasi esaki. Por tuma kontakto ku Dorothy Cicilia, Ada Albertus i Jessie Crestian.

E aña akí Simadan di Pastó ta dediká na Saluciana Meralda Frans-Frans. Deseando un i tur un bon Pasku di Resurekshon, Hesus Resusitá bendishoná un i tur.

Di dos edishon Mosa di Kultura

KRALENDIJK -- Grupo di Simadan E Simia Bon Plantá, enkabesá pa Della Thodé, a logra organisá e di dos edishon di Mosa di Kultura den un sala yen di entusiasmo i kultura djadumingu 13 di aprel na Jong Bonaire. E evento a kuminsá ku un show di apertura produsí pa Johnrick Anthony i e grupo di baile Mosa di Kultura, kaminda públiko por a haña e promé bista di e mosanan.

Despues di esei, a sigui ku un spich di introdukshon, un show di talento tokante e simia ku tur partisipante a representá i un kombersashon espontáneo entre e maestro di seremonia i e partisipantenan, kulminá ku un desfile di trahe folklórico kultural ku a keda sin duda un di e momentu mas impreshonante di e anochi.

Na final di e evento, e resultado ofisial a bai den e siguiente forma:

- Mihó Spich
- Mihó Show
- Trahe Mas Original
- Engelly Peña Coffie
- Promé Finalista
- Hubenil
- Trahe Mas Impaktante

Mosa di Kultura 2025

- Shakeeni Martis
- Mihó Show
- Trahe Mas Impaktante
- Trahe Mas Original
- Mas Popular

Maria-Luisa Troncon

- Promé Finalista
- Mihó Spich

Na final di e anochi, Grupo di Simadan E Simia Bon Plantá a yama un danki di kurason na tur partisipante, kolaboradó i públiko presente. Tur hende a siña, disfrutá i eksperensia e beyesa i profundidat di kultura Boneriano.

Tur simia ku a planta den e evento akí, lo sin duda sigui krese i duna fruta pa futuro di nos konosementu pa e isla.



Mosa Infantil di Kultura 2025

Healy Anthonij

Mosa Hubenil di Kultura 2025

Qiënne-Leah Sint Jago

BAN WAPA KU
20 SIMADAN DI PASTÓ 25
21 APRIL | 5PM - 12AM

DEDIKÁ KU HONOR NA
SRA SALUCIANA MERALDA FRANS-FRANS
MIHÓ KONOSÍ SJON DA



Rijksdienst Caribisch Nederland

VAKATURA

Bo tambe ke traha pa RCN? Bo por solisitá pa e siguiente funshonnan:

- TOP CN Top Trainees
- KPCN Kolaboradó Kuido Básiko di Polis Allround
- ZJCN Kordinadó pa Registrashon i traslado médiko
- RVB Mènedjer di Propiedat
- SSO CN Atministradó di sistema di kòmputar Senìor
- BCN Kolaboradó di Atministrashon i Servisio
- SZW Mènedjer di programa Maneho i Organisashon di proyekto

Mas informashon?

Bishitá www.rijksdienstcn.com/vakatura

Kompania di aksidente fatal di helikòpter a stòp operashon mesora

KRALENDIJK/NEW YORK -- E kompania ku su helikòpter a kai na New York siman pasá, a stòp di biá ku tur aktivitat. E outoridat Merikano di aviashon, FAA, a informá esaki riba X. Seis persona

a muri den e aksidente, e piloto i un famia di sinku turista Spañó, inkluyendo tres mucha di 4, 8 i 10 aña. FAA tambe ta bisa ku e ta lansa un investigashon riba e lisensia i kumplimentu di seguridat di e operadó di

tour New York Helicopter Tours. E anunsio a bin algun ora despues ku e senador di New York, Chuck Schumer, a pidi pa revoká e lisensia di New York Helicopter Tours.

No a anunsiá si e

seramentu ta permanente òf miéntras ku e investigashon ta andando. “Un di e kosnan ku nos por hasi pa honra e bidanan ei i salba otronan, ta pa hasi sigur ku e no ta sosodé atrobe. Un kos ta sigur tokante e kompanianan di tour di helikòpter na siudat di New York, nan no tin un reputashon mortal,” Schumer a bisa.

Den e último binti añanan, sinku helikòpter a resultá den Hudson i East Rivers, debí na fayò mekániko, eror di piloto, òf choke. Binti persona a muri, e emisora Merikano CBS News ta informá. Djasabra, e organisashon di siguridat di transporte, NTSB, a informá ku e helikòpter no tabata karga grabadornan di buelo i ku e aksidente a sosodé durante e di ocho buelo

di dia. No a saka ningun imágen di video i ningun di e aparatonan elektróniko abordo di e helikòpter a graba informashon ku por usa den e investigashon, NTSB a bisa.

Pa kasualidat, e investigadó a bisa ku e último inspeksion grandi di e helikòpter a tuma lugá dia 1 di mart. FAA ta bisa ku e ta sigui sostené e investigashon di NTSB.

New York Helicopter Tours a bisa den un komunikado ku lo koperá ku outoridat durante henter e investigashon. E kousa di e aksidente no a keda determiná ainda. Segun Schumer, e timnan di buseo a buska den awa djadumingu último pa un rotor i un kaha pretu. E partinan ei por duna pista potensialmente tokante kiko a pasa.



Gòlpi nobo den guerra komersial

China por lo pronto no ta kumpra avionnan di Boeing

KRALENDIJK / CHINA -- Un eskalashon nobo den e guerra komersial, China ke pa kompanianan di aviashon Chines stòp temporalmente di kumpra avionnan nobo for di Boeing Merikano.

Esaki ta loke e agensia di notisia Bloomberg a skirbi a base di fuentenan.

Gobièrnu Chines tambe a ordená kompanianan di aviashon pa para tur kompra di ekipo relashoná ku aviashon i piesanan di avion for di kompanianan Merikano, Bloomberg a informá.

E moveshon ta sigui e desishon di Presidente Merikano, Donald Trump, pa hisa tarifanan di importashon riba mayoria merkansia for di

China na 145 porshento.

Avionnan stashoná

Despues, China a tuma represaya ku 125 porshento di tarifa riba merkansianan Merikano. Esaki a hasi Boeing i komponentenan di aviashon Merikano signifkantemente mas karu pa kumpradónan Chines.

Segun Bloomberg, komo dies avion di Boeing ta programá pa keda entregá na China Southern Airlines, Air China i Xiamen Airlines. Algun di e avionnan ta na Seattle, Merka i ta bisa tambe ku algun di nan ta stashoná na un instalashon di Boeing Chines.

Algun di e avionnan ku a pidi por tabatin nan

papelnan di entrega i pago kompletá promé ku e tarifanan di importashon Chines resíproko a dreña na vigor djasabra, Bloomberg a informá. Segun e agensia di notisia, posiblemente lo no entregá e avionnan akí.

179 avion te ku 2027

Segun agensia di notisia Reuters, e tres aerolíneanan Chines mas grandi, Air China, China Eastern Airlines i China Southern Airlines, tin planeá pa kumpra 45, 53 i 81 avion di Boeing respektivamente entre 2025 y 2027.

E gobièrnu Chines tambe ta konsiderando pa reskatá kompanianan di aviashon Chines ku ta hür avionnan di Boeing i ta enfrentá gastunan mas

haltu, segun Bloomberg.

Gòlpi pa Boeing

Siman pasá, Bloomberg a informá ku dos otro aerolínea Chines a posponé e entrega di Boeing 787 Dreamliner. E moveshon di China ta un gòlpi pa Boeing.

Ta antisipá ku e merkado Chines ta responsabel pa 20 porshento di tur avion ku ta dreña servisio durante e próksimo dos dékadan.

Boeing tabata entre e perdedónan riba e bolsa di Wall Street djamars.

Yuda nos tene nos playanan limpi



www.extraboneiru.com



Ami a bai skol básiko i den kurá di skol bo mester a papia hulandes i si fraternan haña bo ta papia papiamentu bo tabata haña kastigu di para na e muraya blou di skol i bo mester a skirbi strafwèrk, mi no sa kuantu biaha ku bo no mag papiamentu. Despues na skol sekundario ya e parti aki a pasa pa olvido i mi mester a konsentrá riba mi èksamen, kaminda mi a haña ingles, franses, spañó i hulandes i mi mester a konsentrá riba Shakespeare, Jules Verne, Palabras, All in One, Pablo Neruda, Federico Garcia Lorca i Jean Paul Sartre i no tabatin ni un pida espasio pa mi idioma papiamentu. A sigui mi biahe pa Hulanda, kaminda papiamentu tabata mi idioma pa komuniká ku mi amigunan di Aruba, Boneiru i Kòrsou.

Papiamentu

Bèk na Kòrsou, porfin mi interes pa mi idioma papiamentu a kuminsá biba, danki na entre otro Joyceline Clemencia, Richard Hooi i especialmente Enrique Muller, ku tabatin programa na Radio Z-86. Pa motibu ku tabata den mi ora ku mi tabata traha na radio, Enrique tabata skucha su programa pasa i despues tabata sigui skucha mi programanan i tabatin kritika pisá riba mi uso di papiamentu. Kasi tur siman mi tabata haña lès di Enrique, kiko tabata bon i kiko tabata robes den mi uso di papiamentu. Mi tabata disfrutá di Enrique Muller su remarken i tabata nota adelanto den mi uso di papiamentu. T'asina mi interes pa mi idioma papiamentu a bai kresiendo i mi a kuminsá lesa diferente buki di outornan kurasoleño. Mi a konosé Elis Juliana tempu e tabata biba den Mundu Nobo i mi tabata bishitá Elis den su

tayer i tabata interkambiá kuné, tokante su obranan, su ideanan i mi ta enkantá ku Elis su obranan. Huntu ku Lucille Berry-Haseth i Maria Diwan, nos a presentá un speshal na okashon di Elis su di 75 aniversario. I despues di esei, mi tabatin Elis su obranan na múltiple okashon den mi programanan.

Mas lat mi a interesá den obranan di Guillermo Rosario, pa motibu ku mi tabatin un simpatia enorme pa e perseveransia di e hòmber akí, ku no tabata entregá, ounke kuantu gòlpi el haña. Mas lat mi a sigui lesa obranan di Luis Daal i finalmente mi konsentrashon tabata riba Pierre Lauffer. E loke ku mi a gusta asina tantu di Pierre ta, Pierre su amor pa su isla Kòrsou. Lesando e artíkulo di Lucille Berry – Haseth: Kada palabra na su santu lugá, publiká den Kristòf jrg. XIII no. 4, mi no por ta mas di akuerdo kuné.

Enkantá

“Pierre tabata enkantá ku beyesa di su isla. E tabata asina fasiná tambe ku papiamentu, ku e tabata ke pa loke e skibi i publiká sirbi pa enrikesé e idioma ku palabra i estilo. Mayoria di su obranan ta kana, kore o balia ku e naturalidat ku kua un gran kompositor ta skirbi sekuensia di su notnan. Kada palabra na su santu lugá. Pierre a probechá – tantu den poesia komo den prosa – e ritmo, melodia i kadans típiko di papiamentu. E palabranan poko komun ku nos ta topa serka dje ta pa konservá rikesa outéntiko di vokabulario di nos lenga.”

“Pierre tabatin e don di deskribí situashon di tal forma – den su komposishonnan musikal tambe – ku ta manera ta un pelíkula bo ta mira. Ora bo tende o lesa Pierre, sin ku

bo ke bo ta hañabo ta pensa ‘ta e so por bisa tal kos di e manera ei’. E ta mustrabo kon zjeitoso papiamentu ta. Kon hende por konta algu, pone otro sea sonrei o grita hari. E ta trese di forma kla, hopi biaha chistoso e berdadero karakter di e personahenan ku e ta pinta. E ta pinta di forma nostálgiko tambe esenanan ku ta hibabo den tal o kual ambiente i, maske kon sensual un tema ta, e outor akí ta keda respetuoso.

Deskripshon

Ata algun deskripshon di Pierre ku mi a gusta mashá: Den un pulchi pa dia: Pierre ta deskribí un freimentu: *“den esei m’a bira kara, mira un pareha ta sinta namorá den medio skuridat, banda di un pilá djis na mi man drechi. Presis dos sekant den klinch!...”*

Pierre ta deskribí un hòmber komiendo un bistek: *“Ku un sombré riba su kabes, brel pretu na su kara i ku furia den su brasan e tabata habraká e pida karni. Kuchú a bira zag den su man robes. E fòrki tabata plantá manera barete den e bistek.”* Pierre ta deskribí ku nan ta zundré: *“Nan a ronkami un palabra na papiamentu, ku no ta pará den dikshonario di Gerrit Jansen.”*

Pierre rekordando hubentut: *“Dushi hubentut. Nos tur ta soña di bo ora nos bira grandi, ora sla di bida ta kokobiá riba nos lomba.”*

Pierre splikando su lugá di sinta den bús: *“Patras den bús m’a sinta ku mi tripanan na papiòt i manera saldinchi den bleki, meimei di tres señora di tamaño formidabel”.*

Pierre deskribiendo un muhé basta bieu ku tabata raskando su lomba na un pilá: *“E tabatin su*

wowonan será, gozando di e grawatashi. Anto e di: “te di... a nos bai den nos skimpat”... (na de dòn der) Un frase so. Pero kuantu tragedia tin den dje, kuantu desesperashon, desilushon. Pierre Lauffer den “Zumbi, Spiritu, Almasola”: “riba un dia nos tabatin un bishita na kas. Un muhé ku ta tira rais den stul, sigui papia sin fin”. “Pesei Fikitu a kana keiru ku su pida ko’i grasía den skuridat, buskando un sitio trankil pa e pone rabu pa e dams”.


“No ku e mosa tabata muchu di akuerdo ku Fikitu su proposishon, pero komo kishikishi tabatin e peseta kaba, el a sukumbí”. “Fikitu a koba mama ku stal ta bula”.

Spanta: “anto mi djentenan a kuminsá bati

manera baliña di barb’i yònkuman”. “Nan lo bai ku tres mucha muhé, pa nan pasa un pleizí di grita”. “Ma mi n’ ta haña ku ta agradabel pa baha pa sawaka nèt dia di Pasku”.

“Ora el a kaba di yena su lampi ku ròm”. “E flecha a pasa koti-koti banda di Virgilio”.

Lucille Berry-Haseth ta sigui: *“Ku rason Colá Debrot a kalifik’é ‘Un poeta pa grasía di Dios’. P’esei mes mi ta sinti ku nos, papiadó di papiamentu, tin e deber moral di balorá i mantené bibu memoria di e poeta-eskritor Pierre Antoine Lauffer. E herensia literario ku el a laga ta prueba palpabel ku el a duna papiamentu kara propio i bos sonoro pa nos tesorá”. Antó e obranan t’ei pa nos lesa i siña for di nan.*



‘Idioma: Brùg òf barera?’

Súplika pa oportunitatnan edukativo igual den Reino

Pa: Juana Kibbelaar

**Pa hopi aña konsehero, trainer i investigadó edukativo, Juana Kibbelaar, a bin ta hala atenshon riba e konsekuensianan di gran alkanse di oportunitatnan edukativo desigual den Reino. E ta deskribí dikon kosnan mester ta diferente i kon nan por ta diferente den diesseis kapítulo bou di e título ‘Idioma: Brùg òf barera?’ Idioma mester konektá, pero no ta semper e ta hasié. Esaki ta bisto for di e debate di dékadananan largu tokante e idioma di instrukshon na Aruba, Boneiru i Kòrsou, kaminda hopi biá emoshonnan ta kore haltu. Un debate ku no por keda mirá den isolashon for di e pasado kolonial, e lucha pa emansipashon, e deseo pa outonomia i outodeterminashon, e búskeda di propio identidat, e eskala chikí di e área di idioma, globalisashon i e ambishonnan di futuro generashonnan.

1. Introdukshon

Di desbentaha pa igualdat Pa mas ku setenta aña kaba regularmente ta konstatá ku e situashon edukashonal riba e islanan ABC ta preokupante i ku studiantenan di abla Papiamentu no ta logrando sufisiente resultado pa motibu di enseñansa na idioma hulandes. E bataya ku ta andando pa dékadananan riba idioma den enseñansa ta bini pa gran parti di un pasado kolonial turbulento. Reino a kuminsá un proseso di dekolonisashon meimei di siglo pasá i na 2025 ainda e ta konfrontando kompletamente e konsekuensianan di su pasado kolonial i di sklabilitut. E pasado akí tambe ta sigui tin un impakto riba e asunto di idioma den enseñansa. Ku firmamentu di Statút na 1954, e islanan, e tempu ei konosí kolektivamente komo Antia Hulandes, a tuma riba nan mes un responsabilidat grandi. Pasobra enseñansa tin un influencia grandi riba desaroyo di un sosiedat den tur su fasetanan, manera desaroyo sosio-ekonómiko,

sosten polítiko, servisionan públiko, etc. Pa por manehá su mes asuntunan outónomo, konfiando riba su mes forsa, pero ku e boluntat pa sostené otro, enseñansa di kalidat haltu ta indispensabel. Bou di e relashonnan polítiko aktual, entrante 2010, Hulanda ta responsabel pa enseñansa riba e islanan BES, Boneiru, Sint Eustatius i Saba i e paisnan CAS, Kòrsou, Aruba i Sint Maarten, kada un ta implementá nan propio maneho di enseñansa.

No opstante, nos ta kompartí un sistema di èksamen i diploma konhunto den Reino. Esaki ta nifiká ku mester alkansá un nivel di konosementu i abilidad ekivalente na Hulanda Europeo i tambe riba tur isla ku por ehèmpel un diploma di enseñansa sekundario general superior. Si diplomanan optené riba e islanan no ta di mesun balor, ko-suidadanonan di e mesun Reino, ta bira siudadanonan di segunda klase den e mesun Reino. I esei ta rekordá e relashonnan kolonial di ántes. Kon bo ta salbuardiá un norma komun ora responsabilidatnan pa edukashon ta dividí. Statút di Reino Hulandes ta asumí mayor independensia i outogovernashon i tin komo meta igualdat entre e diferente partnernan. Hulanda ta grandi, e islanan ta chikitu. E diferensianan den eskalá so ta duna e islanan un posishon desigual den Reino. Pero igualdat ta diferente for di ta meskos. Tumando kontròl di numeroso áreanan atministrativo, konsultá komo partnernan igual i implementá akuerdonan hasí, ta bira difisil si e nivelnan edukativo ta diferensia na tur dos banda di laman. Un forsa laboral bon eduká ta esensial pa e islanan su outosufisiensia, desaroyo sosial i ekonómiko duradero i distribushon di rikesa. Si enseñansa no produsí sufisiente resultado, sosiedat den su totalidat ta sufri. Reino mester boga pa nivelnan igual di enseñansa, spesialmente

riba tereno di enseñansa. Kon enseñansa mester ta pa krea un poblashon bon eduká ku por karga outonomia? Kon bo ta logra un nivel igual di trabou i pensamentu? Den e pùzel edukativo ku mester keda solushoná, idioma ta un pida krusial di e pùzel.

Un herensia kolonial

Riba e islanan ABC, Papiamentu tabata i ta idioma materno pa mayoria di e poblashon. Durante tempu kolonial, Papiamentu i esnan ku tabata papi’é tabata keda despresiá, marginá i humiá. Papiamentu tabata asta prohibí na skol, solamente Hulandes tabata keda konsiderá deseabel komo idioma di instrukshon. Generashonnan kompleto no a haña sosten sufisiente pa ta eksitoso den enseñansa i komo resultado entre otro a dañá nan konfiansa propio. E desbentaha struktural a laga sikatrisnan profundo. Dekolonisashon ta parsialmente tokante kambia relashonnan di poder i eliminá desbentaha struktural. Loke ta nesesario, ta ku e muchanan di awendia ta haña e oportunitatnan ku den pasado no tabatin. Ku papiadónan di Papiamentu por logra un nivel di edukashon igual, ku tur hende por realisá su potensial i ku nan por hasi i sa meskos ku otro siudadanonan di e mesun pais. Pa nan no solamente ta igual bou di lei, pero tambe ta sinti nan mes igual. Awendia, no tin kuestion di prohibishon mas i ta siña muchanan tambe na Papiamentu. Afortunadamente, e inhustisia ei a dispersé. Sinembargo ainda Hulandes ta hunga un ròl prominente den enseñansa i ainda ta un piedra di trompeká pa hopi. Awor nos a kompletá hopi intervenshon. Kon ta posibel ku resultadonan edukashonal no ta mehorá sufisiente? Kon por ta posibel ku e mesun diskushon tin dékadananan andando i nunca a keda resolvé? E kontesta kòrtiku ta, e punto di salida di e diskushon di idioma no mester ta den kua idioma

mester duna enseñansa, pero kiko enseñansa mester nifiká pa un mucha. E seri di 16 parti akí Idioma: ‘Brùg òf barera?’, ta enfoká riba e ròl spesífiko ku enseñansa ta hunga den desaroyo di mucha y riba e problemátikonan ku ta surgi riba e islanan ABC. Kiko ‘Idioma: Brug òf barera’ ta ofresé E maneho di enseñansa riba e islanan ABC ta diferensia pa isla, pa direktiva di skol i asta pa skol. Ademas, loke ta keda deklará riba papel pa loke ta trata maneho no ta korespondé ku loke realmente ta pasa den práktika den klas. ‘Idioma: Brùg òf barera?’ ta indiká e denominadó komun. Pa por haña un bista riba e problemanan i e interakshon entre idiomanan, ta usa akí e divishon aktual di ròlnan entre Papiamentu i Hulandes. For di un perspectiva edukativo, ta kla ku tur dos idioma tin diferente tarea ku no ta interkambiabel. Pues e no ta un historia di sea, òf di antemano, pero un historia di i-i. Awendia, ta sugirí Ingles hopi biá den diskushonnan komo un alternativa pa hulandes. E opshon ei lo keda tratá den un kapítulo despues. Pasobra pa por konsiderá i evaluá un eskoho asina korektamente, mester ta kla promé ki rekisitonan enseñansa mester kumpli kuné, ki problema tin, den ki estado enseñansa aktual ta i kiko mester pa kambia esaki. Sin un komprondementu sólido di e asuntunan akí, kualke sugerensia pa un idioma, òf otro ta un suposishon salbahe. Algun siudadano, generalmente bon eduká, ta usa nan propio edukashon, e desaroyo ku nan a pasa aden nan mes òf ku nan yunan ta disfrutá di dje, komo un kuadro di referensia. Nan ta tuma pa nada ku e tipo di edukashon ei ta eksistí pa tur hende di e mesun manera. Hopi hende no ta na altura ku esaki no ta e kaso di ningun manera pa e gran mayoria di e poblashon. ‘Idioma: Brùg òf barera?’ kier aportá na mas konsientisashon riba e tema akí. E debate tokante



idiomanan den enseñansa a para kompletamente. Pa por avansá den e debate edukativo hopi importante akí, mester wak unda opinionnan ta diferensia i unda nan ta di akuerdo. Tin akuerdo tokante e resultadonan edukativo insufisiente. Tur hende ta di akuerdo ku e abilidadnan di idioma Hulandes riba e islanan ABC ta laga hopi di deseá. No tin un akuerdo tokante e seriedat di esaki i e konsekuensianan di dominio insufisiente di e idioma Hulandes a keda supeksponé.

Loke ta uni e diferente partidonan ta ku tur hende kier mihó resultado edukativo. Pa e futuro di nos mes nietunan i pa e merkado laboral i pa desaroyo sosial en general. Mehorashon efektivu ta kuminsá ku un análisis di kontenido edukativo di kousa. Dikon e rendimentu edukativo ta insufisiente? Kiko eksaktamente ta e problema? I dikon hende no ta bini huntu? Un vishon kompartí di kiko e problema ta realmente ta un punto di salida esensial pa pensa huntu tokante solushonnan i intervenshonnan nesesario. E seri akí lo hasi kla ku tin diferensia den e perspektivanan i puntonan di salida ku kua partidonan ta mira e tema akí i ku no ta tur hende ta papia di e mesun kos. Sin un vishon kompartí i puntonan di salida komun, kualke debate edukativo ta sin sentido. E ora ei e diskushon akí lo sigui pa añanan largu sin un solushon na bista. ‘Idioma: Brùg òf barera?’ ta pone e problema di idioma den enseñansa denter di un konteksto mas amplio. kiko e ta nifiká pa futuro di e studiantenan? I kiko ta e konsekuensianan sosial di e problema akí? Pa optené un resultado edukativo diferente, diferente pregunta ta nesesario.

E otro preguntanan den e seri di artíkulo akí ta kondusí na un diskushon diferente for di loke a keda diskutí tokante di dje pa dékadananan. Pa komprondé e situashon edukashonal aktual, e seri ta kuminsá ku un splikashon kòrtiku di pasado.

Inlubidabel©

E stewardess-nan di ALM

Pa: Bòi Antoin

Ken no ta kòrda nan? E stewardess-nan servisial, amabel, kariñoso i bunita di ALM, un tempu nos kompania nashonal di aviashon. Tirando bista e dianan aki den e archivo enorme di FuHiKuBo m'a topa ku e edishon di wenter 1979 di Trade Wind, e revista ofisial di ALM. Por a haña e revista aki hinká den e vak di stul bo dilanti den avion. A dediká atenshon na algun dje stewardess-nan aki. Riba e portada di e revista por mira dos stewardess di e kompania: Jasmin Fraites i Jessica González-Leerentveld. Nan ta pará na un dje avionnan DC-9 di e flota di ALM.

Tabata e promé edishon di Trade Wind, esta 'Winter, 1979 Vol. 1 – No. 1.

ALM a presentá Tradewind komo un revista ku nan lo pone den nan avionnan. Kada kuartal un edishon nobo, publiká pa Irene Fell i Mary Barer, ku komo editor ehekutivo Maria F. Gonzalez.

Riba página 7 di Trade Wind dos otro stewardess di ALM (Antiliaanse Luchtvaart Maatschappij) ta risibí atenshon: Mary Jeanette Cotalero-Idígoras i i Ruthlin Mathilda Neuman. A saka nan foto huntu den un paisahe di Aruba, asentuando ku ALM ta di Aruba tambe.



Jasmin Fraites i Jessica González-Leerentveld dilanti un avion DC-9 di ALM.

E stewardess-nan spesialmente di Kòrsou i por a topa ku un par di St. di ALM tabata bini di Aruba. Sporádikamente Maarten òf Boneiru.



E antiguo mina di oro na Aruba tambe a sirbi komo sitio pa a inmortalisá Mary Jeanette Cotalero-Idígoras i i Ruthlin Mathilda Neuman riba portrèt. Riba e foto aki, tambe esun otro, nan a lusi den trahe suministrá pa e tienda di moda Bonaparte.





Stewardess-nan Mary Jeanette Cotalero-Idígoras i i Ruthlin Mathilda Neuman bou di un palu di dividivi (watapana) den paisahe geológiko típikamente rubiano.

MONCHI & TONCHI

Tonchi, Deesje ke gana plaka ku yerba medisinal...

Awèl sí, mihó nos kuminsá piki welensali. Ta bòshi plaka nos ta gana...



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcedencia

Redakshon
Papi Antoin
Edson Pietersz

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòi Antoin
786-6818

Aviso
avisobon@gmail.com

STATIA/SABA/ST. MAARTEN

Winair i Outoridat di Turismo di Antigua i Barbuda ta forma relashon stratégiko

SIMPSON BAY -- Den un movimentu dirigí riba fortalésé turismo regional i mehorá konektivitat den Karibe, Windward Islands Airways International Winair i Antigua and Barbuda Tourism Authority, a drenta ofisialmente den un partnership stratégiko entrante 1 di mart.

E kolaborashon ta diseñá pa elevá e profil di Antigua i Barbuda komo un destinashon Karibense prinsipal miéntras ta destaká e ròl klave di Winair den biahe aéreo regional.

E inisiativa ta enfatisá un kompromiso kompartí pa impulsá turismo i mehorá eksperensianan

di biahe sin problema pa bishitantenan di Karibe. Winair aktualmente ta operá 17 buelo semanal for di Antigua pa destinashonnan klave entre otro St. Maarten, Tortola, St. Kitts i Dominica. Adishonalmente, atraves di su sentro na St. Maarten, Winair ta ofresé

konektivitat ekstendé na Karibe mas amplio, Merka i Europa, via akuerdonan di codeshare i interline.

“Winair ta kontentu di por lansa e asosiasion akí ku Outoridat di Turismo di Antigua i Barbuda,” Hans van de Velde, CEO di Winair a bisa. “Dor di kombiná nos forsan, nos ke oumentá visibilidat pa tantu nos kompania di aviashon komo Antigua i Barbuda, enkurashando un biahe regional mas grandi i fomentando konekshonnan mas profundo entre komunitatnan karibense.”

Charmaine Spencer, Direktor di Turismo pa Karibe i Latino América na Antigua i Barbuda Tourism Authority, a hasi echo di e sentimentu akí.

“Nos ta kontentu di por uni forsa ku Winair den posishoná Antigua i Barbuda komo un eskoho

prinsipal pa biaheronan di Karibe.

E aliansa akí ta permití nos traha kampañanan di merkadeo dirigí i impaktante ku ta mustra e bunitesa, kultura i hospitalidat di nos islanan.”

Un komponente klave di e asosiasion lo ta e desaroyo di strategianan di merkadeo integral dirigí riba públiko karibense. E kampañanan akí lo probechá di e ret di buelo ekstenso di Winair i e ekspertisio di destinashon di Outoridat di Turismo pa promové e nashon di dos isla na bishitantenan nobo i esnan ku ta regresá meskos.

Tur dos partner a ekspresá konfiansa ku e aliansa lo entregá benefisionan a largu plaso, stimulá biahenan regional i sostené kresementu sostené di turismo den henter Karibe.



Djadumingu di Palma na Statia

ORANJESTAD e kongregashonnan di e (EUX) -- Djadumingu di Palma a keda selebrá na Sint Eustatius ta desfilá den kaya ku nan djadumingu mainta, ku palma.

Iglesia Metodista di Bethel tabata kanta i baila riba e ritmo suministrá pa Shelton Sealey. E brigada di mucha muhé Metodista di Bètel, a dirigí e marcha ku a terminá na Black Harry Lane, kaminda e misa ta situá.

E partisipantenan di e

parada a tene nan palma miéntras nan tabata kana i personanan a forma liña riba kaya pa wak.

Fr. Lukas Batmomolin i Diakono Ricardo Fortin Sr., a dirigí e kongregashon Katóliko Romano durante e sirbishinan di Djadumingu di Palma.

E kongregashon a kuminsá e mainta na e klup Katóliko Romano, kaminda tabatin e bendishon di e palmanan. Esaki sigui pa un marcha pa Misa, kompañá pa vários himno. Iglesia Katóliko Romano tin diferente aktividat pa marka siman santu.

Yuda nos tene nos playanan limpi



extra
...number 1

www.extraboneiru.com



Dòkternan di CMC ta pèrdè demanda pa ahuste di salario

WILLEMSTAD -- E asosiashon profeshonal di spesialistanan médiko, a pèrdè un demanda kontra HNO Transitie en Exploitatie N.V., gerente di Curaçao Medical Center (CMC).

E kaso tabata drai rònt di e pregunta si e hospital tabata permití pa sigui paga salarionan mas haltu durante un areglo di transishon, apesar di e introdukshon di e lei ku ta limitá salarionan haltu, Landsverordening

Normering Topinkomens (LNT).

Di akuerdo ku e spesialistanan, CMC a primintí di oumentá nan remunerashon durante e fase di transishon pa medio di indeksashon, kresementu

di salario i kompensashon variabel, asta si esakinan surpasá e máksimo legal. Nan a pidi Korte pa rekonosé formalmente e kompromisonan ei i a pidi pago di salarionan pendiente for di 2021 te fin di 2024.

For di yanüari 2025, nan tabata ke keda kompensá te na e salario máksimo permití durante un periodo di tres aña. E hues a rechasá e demandanan ei. Den e akuerdo di 'Medical Professionals Remuneration' di novèmber 2019, ta bisa ku salarionan ta keda indeksá kada dos aña riba 1 di yüli a base di e kosto di bida. Pero for di 21 di desèmber 2022, e lei di LNT ta na vigor.

E lei ta limitá e entrada di funshonarionan haltu den institutonan semi-gubernamental, inkluyendo CMC. A establese anteriormente ku e lei ta konta pa spesialistanan médiko tambe.

Hues a konkluí ku indexering, kresementu di salario adishonal, òf rekompensa variabel ku ta surpasá e LNT, ta kontrario na lei. P'esei hospital no ta permití pa hasi e pagonan aki, ni si a hasi palabrashonnan anterior tokante esaki.

E salario anual aktual di un spesialisista médiko na CMC ta entre 300.000 i 660.000 florin, dependiendo di eksperensia i añanan di servisio.



Eks direktor di TeleCuraçao a pèrdè kaso

WILLEMSTAD -- Eks direktor statutarario di TeleCuraçao, Terry Hernandez, a pèrdè un demanda ku el a presentá kontra TeleCuraçao despues di su retiro. El a pidi reembolso pa gastunan médiko, pero Hues a nenga su petishon. Na mes momento, Hernandez mes mester paga bèk mas di nuebe mil florin pa motibu di un kompensashon pa outo risibí inkorektamente.

Hernandez a keda nombrá komo direktor statutarario interino di TeleCuraçao di 8 di yüli 2022 pa un periodo di un aña. E nombramentu a tuma lugá a base di un asina yama 'opdrachcontract'.

E kontrato a keda firmá dia 10 di mei 2023, ku efekto retroaktivo di 8 di yüli 2022 pa 7 di yüli 2023. E akuerdo a stipulá

ku Hernandez lo risibí dos mil florin tur luna komo kompensashon pa gastunan di outo. Tambe e partidonan a palabra ku TeleCuraçao lo reembolsá gastunan médiko pa Hernandez i su pareha, inkluyendo chekeo, biahe i estadia.

Segun TeleCuraçao, e kompensashon no tabata hustifiká, pasobra Hernandez tabata kore un outo pertenesiente na Antilliaanse Televisie Maatschappij (ATM), un filial di TeleCuraçao. P'esei e abogado di e kompania a eksigí pago bèk di e kompensashon di outo risibí durante un periodo di 1 luna.

Hernandez mes a atmití anteriormente ku e debe TeleCuraçao diesocho mil florin, pero despues a retirá e atmishon ei.

Hues a determiná ku enbèrdat Hernandez

mester paga bèk un suma di nuebe mil florin na kompensashon di outo. Pa loko ta trata e gastunan médiko, Hues a dikta ku Hernandez no tin derecho riba esakinan, pasobra

e mes no a logra paga e prima pa e seguro básiko obligatorio.

Otro demandanan médiko, manera pa kontrol i biahe, tambe a keda rechasá pa falta di

base legal. Ademas di e pago di e kompensashon pa outo, Hernandez mester paga tambe e gastunan legal di e otro partido, fihá na dos mil sinkushen florin.



DEPORTE

Celine van Loe ta bira promé tenista ku a gana single

KRALENDIJK – A hunga partidonan individual riba kanchanan di Eddie na Hato, e kas di e asosiasion di ténis pa seis wikènt den tres kategoria, dibertido, intermedio i avansá, pa e triunfo.

Dama i kabayeronan a hunga kontra otro den e mesun orarionan. E dia final tabata un éksito rotundo ku finalnan dibertido, entrenamentu di premio i barbekiú.

Tambe a partisipá na Siman Internashonal di

Deporte i interkambio a tuma lugá ku e klup di ténis di bich e fin di siman ku a pasa.

E pul avansá tabata emoshonante i Andres Kock eventualmente a gana. Na e fun, Celine tabata e ganadó despues di un final emoshonante kontra Eva. Den e final Intermedio, Joeri tabata mas fuerte ku Tom.

Direktiva ta kontentu ku e kantidat grandi di partisipante i e interes kresiente den ténis. E

asosiasion di ténis ta yen di plannan pa futuro. E kompetensia di dòbel pa adulto ta kuminsá atrobe na luna di mei.

Inskripshon ta posibel te dia 1 di mei.

Tin un torneo pa hubentut dia 26 di april i pronto ta duna klínikanan grátis den e barionan huntu ku INDEBON. Tambe e asosiasion di ténis ta organista lèsnan di ténis pa hubentut djamars i djáragon atardi. Ainda tin algun lugá disponibel pa esaki.




‘Glow in the Dark Padel’ ta sòru pa un anochi plasentero

KRALENDIJK -- Djasabra anochi Kunuku Padel tabata sentro di deporte i ambiente. Na e kunuku a organisá un edishon spesial di padel, un deporte ku ta hunga ku rèket i bala, un kombinashon di ténis i skuòsh.

A kombertí e kancha di padel kompletamente ku iluminashon neon, loke a pèrkurá pa un ambiente dushi i úniko, segun un publikashon di Boneiru.nu. Hopi amante a bini huntu pa partisipá na un kompetensia di padel espektakular 8 kontra 8 ‘glow in the dark’. Deportenan di

rèket ta lantando hopi último añanan na Boneiru. Tantu ténis komo ténis di bich a krese hopi den popularidat i kantidat di partisipante. Padel tambe ta ganando tereno rápido. E organisashon di deporte INDEBON asta a anunsiá di tin plan pa konstruí próksimamente kanchanan di padel ofisial riba e isla. No a anunsiá ainda ki dia lo realisá esaki. E anochi eksitoso na Kunuku Padel ta mustra en todo kaso ku e interes pa padel ta grandi na Boneiru i ta parse ku e deporte ta sigui krese mas i mas.



Bunita obra di karidat

Ainda tin hopi boluntario aktivo, manera Nazario Alberto, kende a limpia tur e sushi ku tabata rondoná e krus riba Seru Largu i a fèrfi hink'é den un bachi nobo. Djabièrnè ta Bierna Santu i Pastor Marc ta invitá un i tur na kaminda di krus pa 7'or mainta riba Seru Largu.



CHARCOAL
BBQ

\$139



PS5
CONTROLLER

\$84




Also available in



2-Drawer
Writing Desk

\$195



CityShop

Smart shopping ▶ Better living



5-YEAR WARRANTY & INSTALLATION INCLUDED



Westpoint
Inverter Aircos

STARTING AT

\$379

5-YEAR WARRANTY & INSTALLATION INCLUDED



LG Dual
Inverter Aircos

STARTING AT

\$569

Beat the Heat